



Inatsisartunut ilaasortaq,
Jens-Frederik Nielsen
Demokraatit
Maani/

Ingerlatsisutut nutaat pillugit § 37 naapertorlugu apeqquummut nr. 2023-35-mut malitseqartitsilluni akissut

Aalisarnermi ingerlatsisut nutaat pillugit Inatsisartut suleriaasianni § 37, imm. 1 naapertorlugu Naalakkersuisunut apeqquteqarnikuuvutit. Apeqqut suliaasaqarfigisannit akineqartussanngorlugu innersuunneqarnikuuvoq.

Ulloq: 17-02-2023
Suliap normua: 2023 - 2710
All. nr. 22449931
Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-maili: apn@nanoq.gl
www.naalakkersuisut.gl

1. Avataasiorluni saarullinnik aalisarnissamut ingerlatsisut nutaat ilumut inissaqarnersut Naalakkersuisut kisitsinikkut ersarissumik takussutissamik pilersitaqarnikuunerlutik?

1-imut) Suli naatsorsuisoqarnikuunngilaq, aalisalertussanik nutaanik ammaassinissamut aalajangiitinnani suliamut atatillugu tamanna suliarineqartarmat. Taakku ilaatigut missingersuutininik aalisarnissamullu pilersaarutininik nassiusseqquneqarnikuupput. Tamatuma saniatigut ataatsimut isumaliuteqarnissamut Aalisarnermut Piniarnermullu Naalakkersuisoqarfimmit Akuersissutit pisassiissutillu pillugit nalunaarummi § 12 naapertorlugu maanna ingerlatsisut 2022-mi pisarisat kiisalu aningaasaqarnikkut naatsorsuinerit ilaatigut misissoqqaarneqassammata.

a. Taamaappat Naalakkersuisut akissuteqaatiminnut taakku naatsorsuinerit ilanngutissavaat.

1 a-mut) Siuliani apeqquummut akissut takuuk.

2. Ingerlatsisunik nutaanik isertitsissallutik aalianginnginnermi avataasiorluni saarullinniarlutik aalisarnermik ingerlatsereersunik Naalakkersuisut oqaloqateqarsimanerlutik?

2-mut) Ingerlatsisut nutaat pillugit §37 naapertorlugu apeqquummut nr. 2023-10-mut akissummi taaneqartutut, aalisarnermut ingerlatsisut nutaat isersinnaanissaannut periarfissat takunissaat Naalakkersuisut kissaatiginikuuat, sulili ingerlatsisunut nutaanut pisassiissutininik agguuassisoqassanersoq aalajangerneqanngilaq. Taamaattumik periarfissap sukumiinerusumik misissorneqarnissaata aalajangiunneqannginnerani avataasiorluni saarullinniarnermi ingerlatsisooreersunik oqaloqateqartoqarnikuunngilaq.

a. Taamaappat ingerlatsisut pioreersut taakku qanoq akissuteqarpat?

2 a-mut) Siuliani apeqquummut akissut takuuk.

3. Nunatta Kangiani saarullinniarluni avataasiorluni saarullinniarnermi biologit innersuussutaat 8.460 tons-inut inisseqqavoq. Siunnersuineq taanna annertungaatsiartumik qaangerneqassaaq (ingerlatsisumut nutaamut tunniunneqarsinnaasoq allaat kisimiilluni 7.515 tons-miippoq). Biologit innersuussutaanik qaangeerujussuarnermut suna peqquataava?

3-mut) Nunatta kujataata kitaani Tunumilu avataasiorluni saarullinniarnermut TAC 2021-2023-mut aqutsinissamik pilersaarut atuuttoq malillugu aalajangerneqarpoq. Taanna Pinngortitaleriffik aalisarnermillu inuussutissarsiortut qanimut suleqatigalugit suliarineqarnikuuvoq. Islandimi saarullit nunatta imartaanut pingaartumillu Dorhn Bankemut ingerlaarnerannik ilisimaarinninnerput tunngavigalugu TAC aalajangerneqarpoq. Ingerlaartut qanoq amerlatiginersut suli ilisimanngilarput, ingerlaarnerallu siunnersuineri naammattumik ersersinneqanngilaq. Taamaattumik aqutsinissamik pilersaarummi ilisimasanik katersinerunissaq qitiutinneqassasoq aalajangerneqarpoq, taamaattumillu Dorhn Banke 2021-2023-mut aalajangersimasunik TAC-lerlugu nammineq immikkut aqutsiveqarfinngorpoq, aqutsiveqarfimmilu nunatta kujataata kitaani Tunullu kujataani ICES-imit siunnersuineq malinneqarluni. Tamatuma saniatigut Islandip saarulliisa ingerlaarnerinut Tunumilu aalisarnermi qanoq amerlatigineranut paasissutissanik katersinissamik kissaateqarneq malillugu aalisarnermi misissugassanik tigooraasoqalernikuuvoq. Paasissutissanik katersineq ilaatigut siunnersuineri benchmarkingimut (nalilersuinerimut) atorneqassapput, tamannalu maannakkut ICES-imit ingerlanneqarpoq. Benchmark naammassineqarpat aqutsinissamik pilersaarut nalilersorneqassaaq. Suliaq taanna 2023-imi martsimi aallartissanganneqarpoq.

Ilanngullugu oqaatigineqarsinnaavoq, Tunup avannaa aamma nammineq immikkut aqutsiveqarfiummat misileraallunilu aalisarfiusinnaasoq. Sumiiffimmi misissuisoqarneq ajornera aalisartoqartannginneralu tamatumunnga tunngaviupput. Taamatuttaaq ilisimasanik amerlanerusunik katersinissatsinnut misileraalluni aalisarnermi misissugassanik tiguisoqartarnissaa piumasaqaataavoq.

a. Saarullinniarluni aalisarneq Naalakkersuisuniit pijuuaannartitsinissamik aallaaveqartutut isigineqarnerluni?

3 a-mut) Tunumi saarulleqassuseq minnerunngitsumillu Islandip saarulliisa akulerussimassusiat pillugit ilisimasat suli amigarput. Ilaatigut tamanna tunngavigalugu aqutsinissamik pilersaarut suliarineqarpoq aalisarnermilu misissugassanik tigooqqaanissamik piumasaqaateqarluni. Ilisimasavut aqutsinissamillu pilersaarummut tunngatillugu Pinngortitaleriffillu qanimut ataqatigiissaarineq tunngavigalugu Tunumi avataasiorluni saarullinniarnermi ilisimasat pioreersut tunngavigalugit ingerlanneqartutut isigineqarpoq.

4. Suna tunngavigalugu Nunatta Kangiani avataasiorluni saarullinnik aalisarnissamut ingerlatsisunik nutaanik isertitsisoqarnissaanik Naalakkersuisut siunertaqarsinnaasorippat, pisassallu innersuussutigineqartuniit annertunerungaareeqisunut ingerlatsisoqareeraluartoq?

4-mut) Siuliani akissummi taaneqartutut aalisarnermik maannakkut aqutsinerimut siunnersuinerimik pitsanngorsaaniissamut paasissutissanik amerlanerusunik katersinissaq tunngaviuvoq. Tamanna tunngavigalugu aalisarnermi ingerlatsisumik nutaamik isertitsisoqarsinnaanissaa periarfissaqarsorineqarpoq. Taaneqartutut tamanna

suli aalajangiiffigineqanngilaq, ingerlatseqatigiiffiit atortussanik pisariaqartinneqartunik
nassiussereerpata ataatsimut nalilersuineq matumani apeqqutaassammat.

Inussiarnersumik inuulluaqqusillunga

A handwritten signature in black ink, appearing to read 'Karl Tobiassen', with a long horizontal flourish above the name.

Karl Tobiassen

Aalisarnermut Piniarnermullu Naalakkersuisoq